

## Таже блаженны,

поставим стихов 8, глас 4.

**Во Царствии Твоем помяни нас, Гóсподи,/ егда приидеши во Цáрствии Твоем.**

**Блажени нищии дúхом,/ яко тех есть Царство Небéсное.**

**Блажени пла́чущии,/ яко тии утéшатся.**

**Блажени крóтции,/ яко тии наследят зéмлю.**

**Блажени алчущии и жаждущии прáвды,/ яко тии насы́тятся.**

Древом Адам рая бысть изселен, древом же крестным разбойник в рай вселися. Ов убо вкушь, заповедь отверже Сотворшаго, ов же сраспинаемь, Бога Тя исповеда таящагося: помяни и нас, Спасе, во Царствии Твоем.

**Блажени мѝлостивии,/ яко тии помиловани бúдут.**

Закону Творца от ученика купиша беззаконнии и, яко законопреступника, Того Пилатову судищу представиша, зовуще: распни, в пустыни сим Маннодавшаго. Мы же, праведнаго разбойника подражавше, верою зовем: помяни и нас, Спасе, во Царствии Твоем.

**Блажени чистии сéрдцем,/ яко тии Бога úзрят.**

Богоубийц собор, иудейский язык беззаконный, к Пилату неистовне зовый, глаголаше: распни Христа неповиннаго, Варавву же паче нам отпусти. Мы же вещаем к Нему разбойника благоразумнаго глас: помяни и нас, Спасе, во Царствии Твоем.

**Блажени миротвóрцы,/ яко тии сынове Божии нареку́тся.**

Живоносная Твоя ребра, яко из Едема источник источающая, Церковь Твою, Христе, яко словесный напаяет рай, отсюда разделяясь яко в начала, в четыре Евангелиа, мир напаяя, тварь веселя и языки верно научая поклонятися Царствию Твоему.

**Блажени изгнани правды рáди,/ яко тех есть Царство Небéсное.**

Распялся еси мене ради, да мне источиши оставление: прободен был еси в ребра, да капли жизни источиши ми: гвоздьми пригвоздился еси, да аз глубиною Страстей Твоих к высоте державы Твоя уверяемь, зову Ти: Живодавче Христе, слава Кресту, Спасе, и Страсти Твоей.

**Блажени есте, егда поносят вам, и изженут, / и рекут всяк зол глагол на вы лжуще Мене ради.**

Распинаему Тебе, Христе, вся тварь, видящи, трепеташе, основания земли колебахуся страхом державы Твоея, светила скрывахуся, и церковная раздрася завеса, горы вострепеташа, и камень разседся, и разбойник верный зовет с нами, Спасе: еже помяни во Царствии Твоем.

**Радуйтесь и веселитесь, / яко мзда ваша многа на небесех.**

Рукописание наше на Кресте растерзал еси, Господи, и, вменився в мертвых, тамошняго мучителя связал еси, избавль всех от уз смертных Воскресением Твоим, имже просветихомся, Человеколюбче Господи, и вопием Тебе: помяни и нас, Спасе, во Царствии Твоем.

**Слава Отцу и Сыну / и Святому Духу**

Отца, и Сына, и Духа Святаго вси единомудренно, вернии, славословити достойно помолимся, Единицу Божества, в Трех сущую Ипостасех, неслиянну пребывающую, просту, нераздельну и непреступну, Еюже избавляемся огненного мучения.

**И ныне и присно / и во веки веков. Аминь.**

Матерь Твою, Христе, плотию безсеменно рождшую Тя, и Деву воистинну, и по рождестве пребывшую нетленну, Сию Тебе приводим в молитву, Владыко Многомилостиве, прегрешений прощению дароватися всегда зовущим: помяни нас, Спасе, во Царствии Твоем.

**Прокимен, глас 4:** Разделиша ризы Моя себе и о одежды Моей меташа жребий. **Стих:** Боже, Боже Мой, вонми Ми, вскую оставил Мя еси?

**Евангелие 7-е, от Матфея, зачало 113:** Во время оно, пришедше воины: **Конец:** Воистинну Божий Сын бе Сей.

**И полагается чтение. Таже псалом 50.**

**И посем Евангелие 8-е, от Луки, зачало 111:** Во время оно ведяху со Иисусом и ина два: **Конец:** От Галилеи зряще сих.

**И абие поем трипеснец,**

**творение господина Космы: ирмосы по дважды, тропари на 12. Последи же ирмос оба лика вкупе. Акростихис, или краегранесие трипеснца есть: Просавватон те: еже есть, Предсубботие же. Глас 6.**